

UTeM jalin kerjasama strategik dengan industri gergasi China



MAJLIS Menandatangani Lol bersama Shandong Fenyuan Chemical Stock Co. Ltd. telah disempurnakan di Yuxi City, China.

Oleh HADI AB. MANAP 21 Disember 2023, 4:41 pm

MELAKA: Universiti Teknikal Malaysia Melaka (UTeM) terus proaktif melebarkan jalinan kerjasama dan perkongsian kepakaran bersama pihak industri peringkat antarabangsa di China.

Terbaharu, UTeM menjalinkan kerjasama bersama dua industri gergasi China menerusi Majlis Menandatangani Surat Niat (Lol) dengan Yunnan Fenglongwan Limited Company dan Shandong Fenyuan Chemical Stock Co. Ltd., baru-baru ini.

Naib Canselornya, Prof. Datuk Ts. Dr. Massila Kamalrudin berkata, UTeM terus ke hadapan dalam konteks memperkasakan jalinan kerjasama dan perkongsian kepakaran di peringkat global.

Ujarnya, ia juga adalah sebahagian daripada usaha komprehensif melebarkan sayap kerjasama strategik global dengan China yang umumnya kian berkembang maju dalam bidang teknologi, seterusnya mencetuskan impak berangkai buat universiti dan TVET negara.

“Jalinan kerjasama strategik antara UTeM dan Yunnan Fenglongwan tertumpu kepada perkongsian kepakaran dalam mempromosikan industri pelancongan, aktiviti promosi produk kesihatan Fenglongwan Limited Company di Malaysia, di samping pertukaran staf dan pelajar antara kedua belah pihak,” katanya dalam kenyataan, hari ini.

Majlis Menandatangani Lol telah diadakan di Kunming, Yunnan, China diwakili Massila dengan Pengerusi Yunnan Fenglongwan Limited Company, Ma Liyong.

Sementara itu, Majlis Menandatangani Lol bersama Shandong Fenyuan Chemical Stock Co. Ltd. pula berlangsung di Yuxi City, China diwakili Naib Presiden Eksekutif Institut Penyelidikannya, Zhilei Tang. – UTUSAN